

PROCEEDINGS OF THE SECOND SESSION OF THE MIZORAM
LEGISLATIVE ASSEMBLY HELD AT THE ASSEMBLY HALL
FROM TO

2ND SITTING 23.10.1972 AT

PRESENT:

Pu H.Thansanga, M.A., B.T., Speaker in the Chair. One Chief Minister and four Ministers and twenty five Members.

Business :- 1. Questions.

2. General Discussion on the Budget.

A House-in Business Advisory Committee ni
21.10.1972 thur el kan chhiar ang a -

Members Present :- (1) Speaker - Chairman.

(2) Pu Ch.Saprawnga

(3) Pu Vanlalhraia

(4) Pu Lalhira

Members Absent :- (1) Pu Hrangaia (2) Pu Zalawma

1. General Discussion on the Budget for two days (23rd & 24 October, 1972)

2. Voting on Demands for 4 days. (25th, 26, 27 & 30th October, 1972)

3. 31st October, 1972 for Official Business.

4. 1st November, 1972 - Private Resolution.

5. 2nd November, 1972 - Unfinished Official business.

The above programme will supercede the programme chalked out by the Business Advisory Committee held on 20.10.1972.

The Business Advisory Committee thurel hi House ah ka rawn puang a, tunah hei hi pawm leh pawm loh tihfel a ngai a, a motion neitu Pu Vanlalhraia han move sela.

Pu Vanlalhraia

Pu Speaker, he House Business Committee ruat hi kan pawm tih ka rawn move e.

AKER: Awle, remti lo kan awm em? (Member te an ngawi a) House-in remtih lohna kan nei lova, chuvangin heta ren ruat ang hian kan kal ang a. Mahse hei hi a tul chuan tih danglam leh theih tho chu a ni a. Tunah Question hun a ni a, thu tlem sawi ka duh a - 'Tunah hian thil ti tir kan ni a, chuvangin dan hi a bu awm mahse hman thiam loh a awm thei a. He laiah hian question thu te pawh hi hriat thiam a tul a, Zawhna kan siam dawnin harsa lo taka Office' lama hriat chian theih mai thil te a nih leh nih loh fiah hmasak a tha a. Office lama hriat fiah mai theih te a nin chuan House a zawh kher tur a ni lo tih Dan pawh a awm a. Tin, kan sorkar hotute pawh biak a, zawh mai theih te pawh a ni a. hotute biak pawh chuan

Chuvangin zawhna siam pawh fimkhur hle a tha ang. Tin, Resolution thua pawh hian siam that loh theih loh te hi a awm a. Tin, tih sual leh hmah te pawh a tam ang a, chungah te chuan in ngaihthiam kan tum tur a ni ang a. Session leha te fel deuh zawka kan tih theih tawh nan ngun deuha ngaihtuah a tul a ni. Tin, zawhna thua te pawh kan ching nasa hle nain pah awm te pawh a la tam mai thei a ni.

Tunah Zawhna hun kan tan ang a. Question No. 1
Pu C. Lalruata question a ni a, han zawt sela.

PU CH. LALRUATA Pu Speaker, ka zawhna te zawh min phalsak
avangin ka lawm a. Ka zawhna hmasa ber chu
hei hi a ni

"Mizo High School Hostel (Upper Hostel) ni
18.4.1972 a thli len thluk tak hmanrua kha khawiah nge a
awm? A in 60 x 17' L anga sak kha a ni a, a chung rangva
a bang dap, a hmanraw dang lung leh thingzaita kha a ni a.
Khang kha sawrkar ta a ni si a.

SPEAKER: Tunah Department concerned P.W.D. lam a ni a,
Chief Minister in han chhang sela.

PU CH. CHHUNGA
CHIEF MINISTER Pu Speaker, hemi Hostel a chhiat hnu a
hmanrua la hmantlak deuh deuh te chu heng
in siam that nan hian hman a ni:-

- (1) Hostel building No. II (Science building)
- (2) High School Ek in.
- (3) S.D.O. Office zun in (E. Division)
- (4) Circuit House No. II
- (5) Circuit House No. 1.

PU CH. SAPRAWNGA Pu Speaker, Supplementary question
Hostel lian zawk kha buai lain a kang
a, a kang bang C.I. Sheet leh a chhuat lung chher te kha
khawiah nge a awm tak le?.

Hei hi U.T. nih hma a ni a, Ministry purview
pawh niin a lang.

PU CH. SAPRAWNGA Pu Speaker, Hostel hmanah khan in dang
an sa ta tihna a ni a, a dik em?

PU CH. CHHUNGA
CHIEF MINISTER: Pu Speaker, Dik e, tunah Senior Officers
Bangla sak a ni.

PU CH. SAPRAWNGA Pu Speaker, Chuti nise, Hostel chu a
awm tawh lo tihna em ni? Hostel hi sak
leh tumna a awm em?

SPEAKER: Chu chu Down Hostel zawk a ni a maw?

PU CH. SAPRAWNGA Pu Speaker, Hostel chu sak tumna a awm.

Chulai chu engpawhnise, question dang pawh alo
kalin ka hria a. Tun a mi hi chu Pu C.Lalruata
zawhna ni 28th April, 1972 a thliin' a tih chhiat a ni a.
Chief Minister chhanna kha a tawkin ka hria.

PU ZALAWMA building Hostel pahnih a awm a, a relevant
a ni a. High School
tawk lo maw?

SPEAKER He thil hi a relevant leh relevant loh thua.
chuan entirna ka han siam ang a, e.g -
Ngaizel ah motor accident a awm a, mi 9 an hliam a, 4 an
thi. Chutah chuan a thi 4 te kha mipa engzatnge, hmeichhia,
engzatnge? tiin zawt ila a relevant tawk lo vang. Amaherawh-
chu Hospital ah engzatnge thi a, a hmunah engzatnge thi
tiin zawt ta ila a relevant a ni.

PU CH.CHHUNGA
CHIEF MINISTER Pu Speaker, chu supplementary zawhna chu
hei nen hian a inzawm loh avangin kari lo
la chhui Iova. Hostel tul leh tul loh chu Education Depart-
ment in a la ngaihtuah ang chu.

PU HRANGAIA Pu Speaker; U.T. kan nih hma a mi kha kan
sawrkar hian a hre thei lo zel mai dawn em
ni ang? An chhan theih loh zel mai tur em ni dawn? A chhan
theihna turin tun hma lam a mi pawh Minister-in an zawt
fiah thei lawm ni?.

SPEAKER U.T. hma a mi chu a Department concerned ten an
an tum a, a hnu a mi pawh a tum tur a ni a,
Chumi ah chuan Department concerned ten an khawih zui
tur a ni.

PU J.THANGHUAMA Pu Speaker, a ni thei lovang U.T. kan
luhin District Council thil tih zawng
zawngge kha U.T. sawrkarin a la tur a ni tih a ni a,
Chuvangin hei hi a chhang thei tur a ni.

SPEAKER Tawk sela, tuna ka sawi ang kha a ni a,
tunah Pu C.Lalruata question No. 2-na.

PU C.LALRUATA Pu Speaker, ka question No.2-na hi chhiar
a ngai lovang i ti a, he laiah hian a
in ziaak sa a, khawngaih takin min chhan theih chuan a
lawmawm hie ang.

SPEAKER: P.W.D. Minister-in han chhang sela.

PU CH.CHHUNGA
CHIEF MINISTER Pu Speaker, Awm e, heng in sak nan hian
sanction hran siam a ni a - chu chu 103
Capital outlay on Public Works both under Plan and Non-Plan,
an ni.

PU CH.SAPRAWNGA Pu Speaker, Supplementary question -
neih ka duh e. High School tlangah sawn
in thar sak a tam tawh hle a. High School compound ah sawn
engzatnge an sak tawh, min hrilh thei em?

PU CH.CHHUNGA

CHIEF MINISTER: Pu Speaker, hemi zawhna hian U.T. kan nih hnua kan insak thu chauh a kawh avangin U.T. hma a mi kha kan thlir tel lova. Mahse he thil hi Member ten tul an tih chuan information chu kan lo pe thei ang.

PU CH.SAPRAWNGA

Pu Speaker, a zat chu kan hre lo a ni mai thei a. Han hriat leh duh ka nei a. High School compound ah inthar chu sak teuh tawh a ni a, chung te chu High School authority phalna a sak an ni em? Nge, a satu ten an sa mai mai em ni zawk? Chuti nise, High School authority ten sawi theihna an nei lo em ni? An protest a, an hneh lo em ni zawk?

High School saw kan khawih rethei hle mai a, enkawltu tak awm lo ang mai a ni hial mai a, chu chu ka han hre duh a ni.

SPEAKER

Education Department concerned a ni a, he thil atan hian separate sanction a awm em tih te a ni a, chu chu Chi Minister khan a chhang tawh a.

PU C.LALRUATA

Pu Speaker, ka zawhna pathumna hi P.W.D. Minister in min chhan theih chuan ka lawm hle ang.

PU CH.CHHUNGA

CHIEF MINISTER: Pu Speaker, hmun renchang leh tha tawh awm loh avangin Secretariat leh Assembly Hall nghet ~~sakna~~ sakna tur chu thlan a la ni lo va. Secretariat Office atan temporary building te sak a ni a. Chutiang bawkin District Council hlui Hall kha Assembly Hall atan chei that a ni.

PU NGURDAWLA

Pu Speaker, hemi Secretariat leh Assembly Hall temporary deuh atan hmun hual lawk deuh a awm em?

PU CH.CHHUNGA

CHIEF MINISTER: Pu Speaker, chu chu ngaihtuah mek a ni.

PU R.ZOLIANA

Pu Speaker, hemi 'permanent Secretariat' Building leh Assembly Hall ah hian zawhna ka siam duh a. Aizawl khawpui 1 A.R. in an luah hi nawr chhuah a, an hmun hi Secretariat Building leh Assembly Hall sakna atan ruahmanna a awm em?

PU CH.CHHUNGA

CHIEF MINISTER: Pu Speaker, An chhuahsan hunah tih a ni ang.

PU R.ZOLIANA

Pu Speaker, an chhuah hunah tih kha sawrkar in nawrchhuah tumna an nei em aw?.

PU CH.CHHUNGA

CHIEF MINISTER: Pu Speaker, Assam Rifles ho hi hun rei tak

PU J THANGHUAMA Pu Speaker, Chief Minister Private
Compound Saron Veng, Aizawl a in thar
sakna estimate hi engzatnge? Sak zawh hun sawrkar hnenah
nge, Chief Minister hnenah an pek dawn?

PU CH CHHUNGA,
CHIEF MINISTER: Pu Speaker, Chief Minister's Office
building tur ama compound chungga sak
hi tuna estimate chu Rs. 65,705/- a ni a, sak zawh a nih
hunah chuan sorkar ta a ni ang.

PU J THANGHUAMA Pu Speaker, kan Minister te hian
chiang taka min chhang nghal thei lo anih
chuan, min la zawt leh ang che u ti tala in chhan awm
a ni e. (Speaker: Chu laiah chuan a relevant lo deuh kan
telh zel chuan hun kan hmang rei lutuk ang tih a hlah-
awm vang a ni e)

Pu Speaker, Question No. 4(b) :-

"He in sakna tur hian ziaak ngeiin
Administrative approval a awm em? A awm chuan ram neitu
leh sorkar inremna te chu engge ni? Chu inremna chu
englai khan nge an ziaak fel? Chutianga a awm si loh chuan
mimal compound chungga sorkar in sak hi dan em ni?
Tu thu neihna in nge he in hi sak a nih?"

PU CH CHHUNGA,
CHIEF MINISTER: Pu Speaker, Chief Minister hnathawh nan
Office chu a tulin hriat a ni a. Chu chu
sawrkar in a sa a, Central sawrkar pawhin an remti a.
(Pu J.Thanghuama: Hei hi dawt a ni, Contempt of approval
a ni) Pu Speaker, Central lehkhia chu a hmu duh a nih
chuan kan produce thei ang.

PU NGURDAWLA: Pu Speaker a number khan kal mai a
tha lawm ni?

SPEAKER: Aw, tha e.

PU J THANGHUAMA Pu Speaker, thil cniang taka min chhan
kan duh zela, chutianga chhanna chianglo
leh fel lo tak te kan in pe dawn a nih chuan he in zah lo
Contempt of House a tling a ni lawm ni?

SPEAKER: Question No. 5 of Pu J.Thanghuama.
He laiah hian a zawhna hi ziaakin kan
hma ah kan nei theuh a, a en thiam lo pawh kan awm lova,
chuvangin a number a kal mai hi a tha a ni.

PU J THANGHUAMA Pu Speaker, hetiang hi ka hriat vawi
khatna a ni. Mahni zawhna pawh sawi
theih loh chu. Hmun dangah pawh ka zin a, hetiang hi a
awm ngai lo.

SPEAKER: Kei pawh hman lawkah Lok Sabha ah te,
State than khat Assembly Hall ah te ka
kal in a zawhna an chhiar lo tih ka hria a ni. Question
No. 1,2,3,4 tiin an kal mai a ni.

PU CHCHHUNGA

CHIEF MINISTER: Pu Speaker, dik lo. P.W.D. in District Council (defunct) hnen atanga building a lak te chu kan Minister te hman atan repair leh siam that a ni a. Minister ten Contractor hnenah tih dan tur engmah an hrilh lova. P.W.D. Officer ten a tul ang chu an hrilh mai zawk a ni.

PU J. THAKGHUAMA: Pu Speaker, he laman pawh hian ka zawhna tak min chhang lova, an pawisa hman dan hi P.W.D. in a hriatpui em? Hemi saknaah hian P.W.D. in hriatpuina an nei lova, an (Minister) tih ang kan sa mai a ni tih Pu Lalawia Contractor pawhin min hrilh a ni.

SPEAKER: Helala zawhna chu Minister te duh ang angin in satuten an sa mai a ni tih hi a dik em? Tunge bill pe ang a, engnge a total expenditure a ti a ni.

PU J. THAKGHUAMA: Pu Speaker, P.W.D. in an estimate hmasa lova. Contractor an thawh tir ringawt mai a ni a, kotia tih hi a man a sang lutkk ang tih a hlauhawm a ni.

PU CHCHHUNGA

CHIEF MINISTER: Pu Speaker, A chhung repairna leh tih danglamna man chu sawrkarin a pe ang. Tuna an hmanral tawh zawng chu Rs. 6,170/- a ni a. Siam that tur zawng zawng, retaining wall siamna man tel lovin, senso tur chu Rs. 1,62,250/- a ni. Retaining Wall siamna tur hi chu la siam fel loh a ni a, senso tur estimate pawh a la hriat theih rih lova, he mi siam nan hian engzatnge sen tur a la hriat loh.

SPEAKER: Question No.5 chhian a ni a, chhan a ni thawh bawk a, a total expenditure engnge?

PU J. THAKGHUAMA: Pu Speaker, Supplementary question ka nei a. P.W.D. estimate ah khan Minister Bangla sakna tur chu Rs. 1,60,000/- a ni a. Mahse Bangla pahnih extent nan Rs. 1,62,250/- sen a ni a. Hemi bakah hian retaining wall man a lo la awm leh dawn a. Estimate awm lova thawh hian awmia a nei em? Tunah hna an thawh zo dawn tawh a ni a, estimate awm lovin engtingge an thawh?

SPEAKER: A chhakah khan Minister ten instruction an pe lo tih a ni a, chu chu a ni mai lawm ni?

PU CHCHHUNGA

CHIEF MINISTER: Pu Speaker, tun hmaa District Council Executive Member te awmna in kha chhe tak a ni reng a, Minister te han awm nan chuan a sitawm a ni. Chuvangin Minister te awmna awma siam a ngai a, nasa tak siam that a ni a, pindan te zauh a siam belh a ni a, a chhuat te pawh siam that a ni a, varandah te pawh siam that a ni a, chung atan chuan Rs. 1,62,250/- sen a ni a. Hei hi Minister pahnih awmna tur siamna atan

PU J.THANGHUAMA Pu Speaker, mi ramah pawh khitiang anga in tha khi ka la hmu lova, P.W.D. in estimate pawh an la siam loh avangin he in sak hi an hriatpui kan ti thei lovang a, In sak vel nan Rs.1,62,250/- kan hman tawh a. Retaining Wall ngai hauh lo siam nan cheng nuai engnge maw zat kan hman leh hi engnge a awmia?

PU CH.SAPRAWNGA: Pu Speaker, question hour a nih pawh kan theihngilh lek lek niin ka hria.

SPEAKER: Hetah hian excluding retaining wall tih a ni a, la final rih loh a ni tih a ni bawh a, a chiang tawh a ni lawm ni. Chuvangin question No.6-na ah kan kal ang.

PU J.THANGHUAMA Question No.6(a): Mizoram sorkarin Chief Secretary in a luah lai chei thatna man hi engzatnge ni?

PU CH.CHHUNGA,
CHIEF MINISTER: Pu Speaker, P.W.D. in repair nana a sen chu Rs. 2,580/- a ni a, Deputy Commissioner in atan Rs. 64,851.37 a seng bawh.

PU HRANGALA Pu Speaker, Chief Secretary in luah lai man hi engzatnge ni ta? British ho hun laia ka Bangla luah man hi chu ka hria a, tuna a in an sak that hnu hian an senso atanga chhutin a in luah man hi engzatnge ni ta? a luah tu hian engzatnge a pek tak chiah? Tun hma lem a mi kha chu ka hre tawh a.

PU CH.CHHUNGA,
CHIEF MINISTER: Pu Speaker, a luah man ka sawi mai thei lova. Member in a duh chuan ka la hrih thei ang a. (Pu Hrangala: Tunah a sawi theih loh chuan luah man a nei lo tihna em ni?)

SPEAKER: A nei lo tihna a ni lova, member in a duh chuan he lo hrih thei ang a ti a ni mai a lawm.

PU J.THANGHUAMA Q.NO.6(b): Pu Speaker, Raj Niwas chei thatna man zang zang (Electric a tih enna leh chei mawina) hi engzatnge ni? He hna atan hian Tender Koh a ni em? A nih chuan Tender engzatnge an hmuh? An hmuh loh chuan engnge a chhan?

PU CH.CHHUNGA,
CHIEF MINISTER: Pu Speaker, Raj Niwas chei thatna (Electric leh chaw mawina) atan hian Rs.2,40,300/- chauh sen a ni a. A hna thenkhat te chu Department in a thawh a ni a, athen te chu Contractor ten in beremin an thawk bawh a, a hmanhmawh thlak avangin, tender koh a ni lo.

SPEAKER: Kan kal thui loh nan kan sawi ang a. Raj Niwas hi Head of the State in a ni a, chuvangin kan sawi tur pawh a awm lova, kan lo telh tawh si avangin kan sawi mai zawh a ni a. Heta tan chuan tawh mai rawh se.

PU J. THANGHUAMA: Pu Speaker, Government High School compound chhunga I.G.P. in sak lai mek atan hian P.W.D. in plan engmah a nei Iova, I.G.P. nupuiin Contractor te chu an tih dan tur a kawhmuh mai thin tih hi a dik em? Dik ne sela, sawrkar in plan pawh aww hauh Iova sak hi danin a phal em? hei hi engnge a chhan?.

PU CH. CHHUNGA,
CHIEF MINISTER: Pu Speaker, chutiang engmah a aww lo.

PU J. THANGHUAMA: Ka sawisel thei lo a nih chuan a dikin ka hre lo.

SPEAKER: Hei hi chu ama establishment a ni, thil dang nen ngaih pawh chi a ni Iova, ama ta pual liau liau a ni. Hei hi chu consolidated fund atanga charged a ni a, not voted a ni.

PU J. THANGHUAMA: Establishment dang a nei a nih chuan ka hre thiam a. Mahsela hei hi P.W.D. siam a nih tlat avangin ka sawi a ni.

SPEAKER: Awle, question No. 7-na.

PU J. THANGHUAMA, Q. NO. 7: P.W.D. in Tuichang lui Keitum atanga mel 3 Keitum - N. Vanlaiphai Jeep Road ah Ferry Boat pakhat a dah a, motor te chi kar kai turin a kartu 6 a dah bawk a. Mahsela heng a kartute hi thirhru (wirerope) aww loh avangin an aww mai mai a ni tih hi a dik em? A dik a nih chuan tu mawhpurhna nge? Sawrkar in engtinge a tih dawn?

PU CH. CHHUNGA,
CHIEF MINISTER: Pu Speaker, hei hi a dik Iova, lawngpu paruk te leh a lawng hi thirhru aww loh avangin an aww mai mai tih hi a dik lo. Fur lain thirhru hmangin lawngpu pathumte hian an khah kai thin a. Tui len lai chuan a hlawhawm avangin lawng hi an hmang ngai lo.

PU J. THANGHUAMA: Pu Speaker, P.W.D. Minister hi zawhna chhang turin a in puahcna lo niin ka hria, Member te zak lovah ka ngai a. Hei pawh hi dawt a ni a, Vanlaiphai a kal te chuan in hria ang a. Khilai mi 6 Boatmen dah chu dawt Chiang bal a ni. Dawr an kai mai mai a, engmah hna an thawk lo. Tin, thirhru pawh a aww bawk hkklo.

SPEAKER: Kan thu sawite hi Parliamentarian tawng hman tur a ni a, fel taka tih tur a ni. Charge te chu kawng hnan a ni a, a tih fel dawn a aww zel a. A chhangtu in a rawn chhang a ni mai a.

PU HRANGAIA: Pu Speaker, he laiah hian zawh chian duh ka nei a. Keitum kawm atanga N. Vanlaiphai kawngah Tuichawng lui in sawi luang tlat mai a, chu chu a dik em ni? N. Vanlaiphai lam lian-ina a lui kan chu Tuichang lui a ni si a, ka lehka kawh ve-ah

PU J.THANGHUAMA: Pu Speaker, Tuichang a ni.

PU CH.CHHUNGA,

CHIEF MINISTER: Pu Speaker, hetiang Ferry a hnathawktute hian englai pawhin hna an thawk reng lova. Mi an lokal in an lo tanpui mai a. Pu J.Thanghuama han sawi ang khan thingpui te chu an zuar pawh a ni ang e. Hetiang hi phai lamah te pawh an awm a, thingpui te pawh chu an zuar ve pawk nual a. Chutiang chuan an awm ve a ni mai ang a.

PU J.THANGHUAMA: Pu Speaker, Information a tan - min lo ngaithiam ula. Chief Minister ka charge lova, P.W.D. hi ka sawisel mai a ni. P.W.D. in chhanna dik lo a pe

SPEAKER: Chu chu Minister hnenah report an pe tawh ang em aw? (Pu J.Thanghuama: Pu F.Pahnuna, P.W.D. Secretary a nih lai khan a hnenah report kan pe tawh a) Hetiang a kan member hoten sorkar hotute haena kan report thin hi a tha a ni.

PU K.L.ROCHAMA: Pu Speaker, He luia lawngpu te hi an thawh han chung tur bi tuk sak an ni em?.

PU CH.CHHUNGA,

CHIEF MINISTER: Pu Speaker, Fur lai hian leilawn a tha lova, thalah chuan lui lian angin an ngai lo a ni.

PU K.L.ROCHAMA Pu Speaker, chuti ni sela, sawrkar hnathawk an ni a, zing ah emaw zanah emaw enghunah pawh passenger tan rawih theih an ni ang em?

PU CH.CHHUNGA

CHIEF MINISTER: Pu Speaker, Rawih theih tur an nih ka ring a. engpawh nisela chiang zawkin memberte chu ka lo hriattir thei ang.

Chumi thla, khami thla miin an la rawn chnang ang a. Question No.8-na. Pu J.Thanghuama.

PU THANGHUAMA: Pu Speaker, P.W.D. Contractor pakhat Thenzawl a miin Aizawl - Thenzawl Jeep Road ah temporary culvert sian nana estimate Rs.3,000/- chauh siah Bill Rs.16,500/- a la tih hi a dik em?

PU CH.CHHUNGA,

CHIEF MINISTER: Pu Speaker, Chutiang a awm lo.

PU THANGHUAMA: Pu Speaker, Chu chhanna pawh chu dawt a ni a, Contempt of House a ni.

Pu Lalsangzuala question No. 9-na.

PU LALSANGZUALA Pu eake, Aizawl-Thenzawl Road hi kum motor tlan theihna turin tih hi a dik em? An lak chuan engtika zawh

PU CH. CHHUNGA
CHIEF MINISTER

Pu Speaker, Aizawl - Thenzawl kawng hi
B.R.T.F. in an la lo.

SPEAKER: Question hour a tawp tawh a, tunah chuan
General Discussion on the Budget ah kan kal
ang a. Hei hi General discussion a ni a, Member ten hemi
a tel lo, kawng dang daiha thu sawi loh tur a ni ang a.
Tin, hun pawh kan fix dawn a, Opposition Leader-in 30 minutes
hun a nei ang a. Parliamentary Chief Whip in 30 minutes
bawk a nei ang a. Member dangin 15 minutes. Tunah Budget
discussion chu tan a ni ang a, han sawi tan ula.

PU HRAGA PU Speaker, vawina kan budget sawi ho
kan ram tana senso tur 'District Budget' an
ruahman thin chu kum tam tak a sawihona ah ka tel ve
tawh a. Kan Budget leh tuna kan budget sawi ho tur khaikhin
chuan tuna ni hi chu tangka a tam em em mai a. Chuvangin a
lawmawm kan ti lo thei lo ang a. Anaherawhchu Schedule for
Works ka han keu hian ka lung a awi lo a ni. A chuan chu
kan Minister te bial chauh cheina tura puahchahna a ang em
em mai a. Bial dang a lang meuh si lova. Zoram hmasawna
tur leh enkawl tumna Budgeta niin a lang lo. Chuvangin
pawm harsa ka ti a ni. Budget puahchah tantirh lai khan
mahni bialah theuh M.L.A. kan zin sang sang a. Kei pawhin
kan bial mipui leh ram tana pawlmawh nia ka hriatte chu
scheme ka siam chhuak a. Development Commissioner leh
Development Minister hmenah ka scheme siante chu ka pe lut
a. Mahse vawin ah hian kan Budget Bu hian pakhat mah
chuang a awm si lova. Heti zozai kan ram enkawlina tura sum
leh pai ruahmanna a Minister te bial chauh tur nia lang
si hi paw ka ti a. Zoram pun hmasawna ngaihtuah lova,
Minister bial chauh hmasawna tur a budget hi, pawm harsa
ka ti a ni.

PU LALSANGZUALA Pu Speaker, kan ram leh a mipuite destiny
chu he House ah hian a innghat a. Tunah
hian kan ram hian kawng 2 zawh tur kan nei a. Chu chu kawng
dik lam leh kawng dik lo lam. Kawng dik lam kan zawh
Mizo te hi hnam zahawm tak kan ni thei ang a. Kan Budget
han en hian a figure chu a lian hle mai a. Mahse a siante
ten District Council hun lai kha an la hre reng ni tur
a ni. An thil ruahman danah a lu lam a lian em em a, a
mawng lam a te leh hle si a. Kan Finance Minister khan
pawisa duh ang tawk awm loh vang niin a sawi deuh a, mahse
hmanah kan Lt. Governor leh khan pawisa thu chu problem
a ni lovang tiin a sawi bawk si a, engnge a awmzia ni ta
ang le. Tin, kan Finance Minister speech point 2-na han
en hian ram dang te nena han khaikhin chuan a zahthlak
zawk hle a ni. Kan ram tana plan leh ram dang tan plan te
hi a in ang lo luguk. Ram hetiang tiat ve lem si chu a
zahthlak zawk hial a ni. Entiran - 4th Five Year Plan
fifth year atan Assam 223,72 Crores, Nagaland 40.00 Crores
Manipur 30.25 Crores, Tripura 34.66 Crores, Meghalaya
38.00 crores, Arunachal Pradesh 17.99 Crores, Mizoram 2.75
Crores.

4 ah hian taxation thu a lang a
Mizote tax lo tura inzirtir ngawt hi a dik lova, mahse
Law-income te hi chu tax kan phut tur a ni lo.
A-pe thei awm chin chuan an pek chu a tha.

Tin, para 5-na a Aizawl District Sub-Division
4-a then thu lo lang te hi a te lama thensawm tam a, a
lian lam a la tlem tho mai a. Hei hi a la rual tawk lo
a ni.

Tin, para 6-naa Administration lam khawih tu
atan C.A. te hna thu a sawi pawh hi a fel lo a ni.
te hi tu lak pawh nise political appointment an ni a, an
roral a lai thei tak tak lo a ni Hnan ni lawkah Kangmun
khua Village Council election ah pawh C.A. in a hova,
chutah chuan hna thawh dik tawk loh a awm a. Heng thilah
te hian Departmental action lak hial tur niin ka hria.

Tin, Local Adminis
Administration of Justice lamah a bul tumtu lam thlak-
thleng (charge) a nih loh avangin eng a ang thei chuang
hauh lovang.

Para 10-na ah Hospital thu a lo lang a. Kan
Civil Hospital hi a tawk tawh lo em em a, ka bial chhungah
pawh dah ve tur ni awm ka hria a, ka lawm hle mai. A
hmun tur awm pawh kan thlir nual tawh a. Mithiam (Specialist)
tam zawk dahte hi thil tih awm tak a ni reng e.

Para 12-na a Soil Conservation lo lang pawh hi
He Department pawh hi a nih tur angin kan la hman lo niin
a lang a, kan sawrkar hian helam ah hian attention pe deuh
se ka duh a ni. Para 12-na a Ginger thuah te pawh hman
lawka Sap Chanchinbu ah "Mizoram Sawthing engemaw
Russia sawrkarin a lei dawn" tih a lo lang a, Helai ah
a rate tur pawh kan la hre leh lawi si lo te hi
hle mai. Tin, para 15-na thu hian duh a in a huan zim a.
Kan ram hi a lo than theih nan mi ram thil tih dan te
kan zir a kan zin kua vel a tul a, chumi ah chuan sawrkar
mite leh zirlai mai te ni lovin kan Politician te hi hawi
zauvin ram dang tlawh kual zau se mi tih dan hre zau
turin zin welna tur tam zawk ruahman nise a tha ang.
Chu chu kan ram a that phah ngei a rinawm. Rualawh
na chang i hre ve teh ang u.

P.W.D. Division tih thuah te pawh hian
tunah hmun la khuar lo an awm a. Hengte hi a thawktu
in daih loh vang niin a rinawm a. Hengah te hian a bul
Administrative Machinery hi a pawimawh ber fova, mahse
thawktu an awm loh chuan pawisa tam mahse a sawt chuang
lem lo a ni. Tin, pawisa tam tak awmte hi hman zawh hman
loh a hlahawm a, anih loh vek chuan dik lo takin an hman
ral mai mai ang tih a hlahawm baw a ni.

Tin, helaiia Plant & Machinery atana Rs. 2 lakhs
chauh hian engnge a thawh theih ang aw - kan hmanrua te
reng reng hi kan rama neihsa a awm lova, ram dang lak
vek a ni zawk si a, a harsatna ringawt sawi hian awmia
a nei lo. Entirnan - Chaina leh India buai lai Khan
Central sawrkar-in khawiah mah Jeep a thawn chhuak phal
vek tak meuhva

Chuvangin chhuanlam dawng lovin a tul ang ang chu Central sawrkar ah kan tur a ni ang. Tin, Opposition lam pawh ang ang angin kan lo pui bawm ve ang che u.

Tin, Water Supply thuah hian ka Bial ah hian mipui kan tam ve hle a, thuah chuan point 5 chauh a awm a, hmi zat chauh hi kan indaih lo lutuk a ni. He lam hna thawk chak thei tur chuan P.D.E. tih len a ngai.

Tin, Electric Supply lam thuah te hian thil ngaihtuah ngun a ngai hle mai, tuna mi ang ngawt hi thuan kan hnu fual lutuk mai dawn a ni. India ram zau zawk programme thlirin April 1973 atangin thla tin khua pakhat Electric power pek i tum teh ang u.

Tin, Para 20-na a Rehabilitation thuah te pawh hian thingtlang lam mi rethei te te te hi ngaihmawh tur niin ka hria. Mi hausa leh awm thei zawk (Middle Class) tana pawisa puk hbeh tur hi in uar vak a, mi hnuai hnung (low-income group) tan tlemte in ruahman si a, hei hi a fel lovin ka hria. Mi hnuaihngunthe hi kan ngaihtuah hmasa in priority kan pe tur a ni.

Tin, Industry lamah te hian hma kan sawn ve a tul a, mahse hmasawn turin thil kan ngaihtuah tak tak si lo. Hmanah Industry lam ngaihtuah turin Central sorkar atangin Study team, tuna kan Finance Secretary, Pu Lalkhama ho ngei hian an lokal tawh a. Report pawh 1971 ah kan hmu tawh a. Mahse tun thlengin Chu Study Team hnathawh chu ngmah a la lang si-lova, kan hotute hian an bawhzui lo niin a lang a. Chuti a nih chuan Study Team dang sawm chhuah leh thin a, an hnathawh ngaih sak chuan si loh chuan sawtna leh thanna a thlen chuang lovang. Chuvangin a hmasa te report ang khan bawhzui phawt tur niin a lang.

Tin, Primary Teacher appointment^{ment} thuah, tunah hian kan sawrkar thar chuan zirtirtu tam tak lak a tum mek niin a lang a. Hetah hian District Council tawp dawn lam a Congress Party-in appointment a lo pek te kha dah luh ve leh ngei ni thei se a lawmawm hle ang.

(Speaker: Hun i hmang tam ta hle a, a tawk tawh mai lawm ni?) (Pu J.Thanghuama: Pu Speaker, kan thu sawi tur te kan in ruate a list pawh kan pe a. Hei Pu H.K.Chakma te chuan an sawi lo mai thei a, Pu Sangzuala hi kan ruat chu a ni)

A tawi thei ang berin ka han sawi ang a, District Levvel angin a kal vek a Co-Operative lamte pawh hi din an tam hle tawh mai a, mahse puitlin chu an awm meuh lo mai a, an failed leh deuh vek a ni.

Tin, E.G.S. thu hi tlem nan sawi leh ka duh a, Mizoram sorkar Office pakhat chuan E.G.S. chu Contract-in Village Council emaw mi rinawm hnenah pek turin a ti a, Ngopa khua ah chuan thil dik lo a awm a, chu chu V/C leh ni pakhat contract thu ah a ni a. Hei hi kei mahat in Department Office lamah ka lo chhui zui ang a. Hetiang thil dik lo takte hi chu Mizoram Sawrkar hian kan duh tur niin ka hre lo va, chhui chhuah ngei pawh ka tum ang. (Speaker: A tawk viau tawh e, hun remchang dangah kan la sawi zel ang chu).

PU R.ZOLIANA: Pu Speaker, Kan Finance Minister zahawm tak thusawi hi a tha viau in ka hria a, mahsela sawi tur tlem ka nei a, member zahawm tak ten ngun takin lo vawng ula. We can execute plan scheme in time tih kha ngahtuah a ngai a. Hei hun kan nei tlem tawh hle a. Department thenkhat ah appointment siam loh tam tak a awm a, chuvangin pawisa surrender tur tam tak a awm mai dawn a, chuvangin kan execute theih a tul hle a ni. Local Administration a sawi hi tha ka ti a. Town Sanitation hi Department lian zawkah siam chhoh ni sela. Phek 5 para 1-na kha lo en leh ila. Ka bial chhungah chuan nurse lukhum var khum lo pawh an tam a, tin, Finance Minister Speech kha kan study chuan kan Budget hian khawpui lam a kawka, thingtlang lam tan Doctor a awm lova, Aizawl, L-unglei leh Durtlang lam tan vek a ni. Ka bialah chuan Dispensary 13 a awm a, a dangte chu Dispensary pawh nei lovin an awm a ni. Ambulance Van pawh hi Hospital tan chauh ni lovin Dispensary tan pawh awm ve sela. Tin, Industrial Institute chungchang a sawi kha sawrkar hlui mualphona a ni a, a rang thei ang bera Aizawla sawn chhoh turin ngaihtuah ngei ni sela ka duh a. Bangla Desh atanga Mizoram Trade Agreement ah khan sawhthing a tel ve lova telh leh ni ngei bawka se la. Scheme kan siam thiam chuan pawisa lam hi chu a lungngaih thlak lo hle a ni tih chu kan Finance Minister zahawm tak thusawiah kan hmu a ni. Tourism hi a pawimawh hle a. Information Centre 20 pawh hi a tlem lutuk a, khawtin ah dah tur a ni. Phek 8-na kha kan en chuan keini bial Group ve loh te min hmah niin a lang a, kan thil dawn ve te hi a tlem hle thin a. Tin, Tui hi thingtlang khawte ah pawh pek ni ve sela, Block Development Scheme hnuaiyah dah lovin, thingtlang mite tui lama an harsatna hi a nasa em em a, mahsela nikum chhung pawh khan Survey engmah siam a ni lova, hun remchangah kan hotute pawh ka zawt ang a. Phek 10-na ah khan "Small provision" tih a ni leh thin? Kan rom tana tul nia kan hriat chuan thahnem tham deuh kan siam tur a ni lawm ni? Zoram buai avangin Security Force ten khua an hal sak a, (e.g. Sialsuk) tunah pawh raw ban an la hmang a ni. Chuvangin Housing Loan hi Aizawl a chengte tan chauh ni lovin thingtlang a mite tan pawh siam ni ve sela, chutiang bawkin Relief and Rehabilitation pawh hi a tul a ni. Finance Minister thusawi phekk 10-na a Council of Scientific and Industrial Research chungchangah khan sawi duh ka nei a. Hnan deuh a Pu Lalkhama I.A.S. te an lokal a, an thil hmuh report kha sawrkar hian ngaipawimawh sela, midang bawka a hrana sawm leh thin hi a tul in ka hrelo. Khawl lam chungchangah chuan Mizoramah fu chinna hmun a tam ta hle a: tunah hian fu her khawl 124 kan nei a, za dang pawh awm sela kar lovah kan lei zo vek mai ang. Phek 11-na ah khan Education Director chungchang sawi a ni a, a lawmawm hle a, mahsela he Department hian staff experience nei te emaw nei tam tawka em? A tawp ber ah chuan phekk 12-na a Pilot Project kha a hma in tih theuh a ni lawm ni? Primary School zirtirtu lak belh tur te pawh kha a tlem lutuk bawka, pupil:teacher ratio 1:40 tih kha 1:30 ni bawka sela ka duh ngawt mai, ka lawm e.

PU R.DOTINAIA: Pu Speaker, kan Budget chu Zoram sorkar Finance Minister in a present ta a. Hna thawktu awm lovin pawisa leh hun hi a ral duak duak ang tih a hlauhawm a ni. Mizoram chu District 3-ah then a ni a, hemi then dan hi a population ngan in proportion lo a, Aizawl District hi a lian em bik a. District hnihah then

Anih loh leh Subdivision 5 ah tal then nise, chuti lo chu thingtlang kilkhawr a mi te tan hna a kal chak lo bik a. Tin, thingtlang lam inawpna ang chi atana Local Administration Department a lo ding ta hi a tha hle a, mahse helai ah hian Village Council te hlawh tur hi an siam tlem lutuk a, Village Council te hi kan hotute khawilo kal a mahni hna pawimawh kalsan a lo buaipuitu te an ni a, Mi lian leh mi pawimawh te lo buaipui nan hian a hranpa a fund pek ve ni hial sela. Chuti a nih loh ~~kan~~ pawhin an hlawh hi chhungkaw eikhawp ve deuh tal ni se, an buai em avangin.

Tin, kan Budget ah Schedule for Works hi kan thlir chuan hnathawh tur lian tak tak a tam mai a, mahse kan Education Minister leh kan Member te pawhin min han hmuhpui tawh angin ka bial tana harsatna nasa tak pakhat chu Tuichang lui khi a ni a. Kan Budget ah hian Tuichang lui siamna tur ruahman a awm lo a, ruahman ni ve thei ngei sela. Ka bial chhunga thil tih tul zual te chu hmanah Development Commissioner hnenah pawh ka theh lut nual a. Khinglai khaw thenkhat khat te khian N.Vanlaiphai a mi khi chak an rawn lam ve thin a, chung tan chuan karkawng ~~ka~~ te pawh khi siam that a tul em em a, Tuichang lei khi siam ngei ni bawk sela.

Tin, Hospital lamah hian N.Vanlaiphai hi a tel hawh lo mai bawk a. Tuna Doctor awm khi a nep hle mai a, e engkim maiah khian compounder khi a ring chawt mai tih tur a ni a. Tin, a building khi a chhe tawh em em mai bawk a, tunah hian sak that tura an rawn telh ve ka lo beisei nen a tel lo hi a mak ka ti hle mai - Khum 30 emaw 50 emaw te awm theihna tur tal chuan siam ni ve ngei se la. He thil hi kan Hon'ble Minister pawhin lo chhinchhiah se ka duh hle mai.

Tin, Tourism lamah hian pawisa tlem te ruahman nian alang a, potentialities thuah N.Vanlaiphai velah khian khualzin te mit la thei tur tak tak siam tur leh siam tlak a tam ve mai a, khing te khi tih ve tak tak ni se.

Tin, Water supply thuah hian Aizawl khaw chhungah mai pawh hian veng kil khawr deuhah te chuan la dawng phak lo an tam mai a, a sem hun te pawh hi a mumal lo lutuk reng reng a. Khawpui ah pawh heti hi a la ni a, thingtlang ah phei chuan engtikah tak tui hnianghnarin dawng ve ang maw! Mizoram khaw lian deuh deuh ah te chauh tui sem tum niin a lang a, hei hi a taw lovin ka hria. N.Vanlaiphai ah te pawh hian P.H.E. Department in buai hmaa hna an lo thawh tawh buai avanga an chawihsan tak te khi chhunzawm ka thuai ni thei bawk sela ka duh a ni. Kan sorkar in pawisa hman tur tam tak a nei a, hman hi kum ral hmaa tha taka hmaggo zo thei turin hnathawktu tur pawh lak thuai thuai a, rawih zung zung nise. Tin, ram hmasawn nan Fu herkhawl hi a tul hle mai a, mahse khawl manhi a tam em em mai a, sawrkar subsidy rate pawhin Rs.400/500/- a ni mai a. Hemi lam atan hian Loan hi ngaihtuah ni ve se. Tlangram lo neih ah hian kan hlawhchham tulh tulh dawn a, a thlak nan fu huan siam hi thil tha tak a ni a, mahse ka sawi tawh

PU LALKUNGA

Pu Speaker, Hei hun hnukung tak takah Budget Session kan han tan ve chauhva.

Phek khatna tawpahn kan ram buai kan nih avangin India sawrkar in min ngaihsak viau a ti a. Kei chuan min ngaihsak lo pheh chu ka ti hauh lova. Amaherawhchu October thla ral dawn lama Budget Session han neih chauh mai chu, kan dil thiam lo em ni chu aw ka ti deuhva. Pawisa tam tak nei mah ila hun a tlem tawh si a, hei zozai kan hman sen loh chuan min awhsan mai mai em ni aw te ka ti hial a. Mizoram mipuite hi chhiah pe thei dinhmunah kan ding rih lova, Mizoram dinhmun te siam tha tur hian sawrkar in min pek loh chuan siam tha thei tur kan awm lo va. Chhiah te pe thei turin sawrkar hian mipuite min siam hmasak a ngai a.

Tin, kawng chungchang lam hi han sawi ila, kei chu khawthlang lam khua ka ni a, Pu Nihuma nen hian kan bial lam te pawh kal dawn ila Aizawl atanga in ah chhuah nghal a ngai mai a. Chuvangin, kawng kan mamawh hmasa em em a ni. Mahse Vairengte khawlai siamna zah pawh kan chang si lova. Helalah hian a hmasawn tawh lam ni lovin a hmasawn lo lam kan ngaihtuah hmasak a ngai dawn a. Khawthlang chuan Tlawng dung khu eizawna pakhat a ni a. Keini lam khu chuan Tut lui dung khu kan eizawna ber pakhat a ni a. Chuvangin Tut dung khu Vawngawn atanga Sabual thlengin kawng tha kan siam a mamawh a ni.

Tin, Director of Education (D.E) hi heti teh hluauva fak pawh hi tul ka ti lova. Sikul tha zawk nei hote chu thingtlang lam hi kan ni zawk a. Keini thingtlang lam mite chuan D.E. te chu kan be tha ve phak lova. Kei mahni M.L.A. tak ngial pawh hian kan be tha thei lo a ni mai si a.

Kan sawrkar hnathawk hote hi an indaih lo em em mai a. Helalah pawisa nei teuh mah ila, a thawktu an in daih chuan siloh chuan engmah a sawt thei chuang dawn lova. Tunah 1973-74 Budget buatsaih a hun leh tep a ni tawh mai si a. Hemi hi kan vui liam mai mai ang tih ka hluauva. Ram pum han enin hriselna lamah te chuan Khawthlang lam ain khawchhak lamah chuan Hospital te Primary Health Centre te pawh a awm a. Keini khawthlang lamah chuan damlote pawh damdawi in pan turin Aizawl a in zawn ngawt a ngai mai a. Aizawl ah Hospital 2/3 awm a ngai lo thingtlang lamah chuan damdawi mamawh em em in nitin mi an thi mai ang. A ram pum ngaihtuahin kan ram thatna tur ngaihtuah a kan tih hi a tha a ni. Ram buai tak avanga Kanghmun a Primary Health Centre awm thin an thiat tak kha dah leh nise ka duh a. Lallen te Phuldungsei te Barpara te pawh inkal pawhna pawh a awm lova, hengte hi ngaihtuah turin helalah hian ka han sawi duh a ni.

Hemi kan Budget hi a tha thei ang bera kan hman ka duh a ni.

PU NGURDAWLA

Pu Speaker, Member zahawm tak Pu Lalkunga sawi hnua sawi kha ka duh a, a chhan chu Budget ah hian khu lai ka bial harsatna bik Inland Water Transport engmah a lang lova. Kan Finance Minister zahawm tak thusawi ah khan I.W.T. hi transfer chhoh mai budget a ni.

Reiek vel te pawh khu tih hmasawn a tul em em a, ke a kal pawh harsa tak a ni a, mahsela kan Budget ah kha chuan a lang ve lova. Chuvangin a tha tawh sa chei na tur lam ringawt hi kan uar dawn niin a lang a, a pawisa hle a ni. 'A neisa an pek belh a, a nei lo te an hlamchhiah' tih ang mai a ni a. Helai Mizawl Bazar kang tanpui nan ruahman Rs. 75,00,000/- kha thingtlang lam pawhin an mamawh em em ve tho a ni tih hriat a tul a. Heng hi kan hriat loh chuan he sawrkar hi hleih nei sawrkar leh Government for the urban people angin a lang mai dawn a ni. Land Settlement kha Finance Minister thusawi ah khan a lang a, mahsela thingtlang lam mite tan a ruahman a awm ve lova, a pawl hle in ka hria a, ngaihtuah sak ngei turin kan Minister ka ngen bawk a ni. Agriculture Scheme ah thil concrete deuh hlek a siam a awm lo deuh in a lang a. Pu Lalsangzuala, kan Member zahawm takin a sawi angin Lt. Governor in House a address ahhe Mizoram hmasawna turin pawl sa lamah harsatna a awm lovang a ti a. Chu chu kan hriat reng a pawimawh a ni. Agriculture lamah hian kan entir tawhte hi a hlawhchham zel niin a lang a. Ram dang mite pawh ruai leh mah ila kan hlawhchham leh mai ang tih a hlauhawm a ni.

Tourism pawh hi a aia lian zawkin siam ni sela, ramdang mite en theih turin thil ruahmanna te pawh kan la nei numal lo va. Tourist te tana hmuh chakawm awm deuh te enin Department pawh a hrangin awm thei sela, ka lawm e.

PU SAITLAWMA: , Pu Speaker, ni 20.10.1972-a Finance Minister zahawm takin Mizoram sorakar thar a budget hmasa ber House a, a present tuma, a thusawi (speech) chungchangah khan sawi ve duh ka nei teuh mai a. Ka hmaa member zahawm tak tak ten an sawi tawh ang khan, he budget estimate hi a kimchang thei ang bera, ka en chhuah hnuah thingtlang mipui te tan chuan lungawi loh thlak tak a ni ngeiin ka hria a. Khawpui leh bial changkang sa tawh te tan pawisa hmanna tur ruahman a tam hle a. Thingtlang khua, hmun kirkhawr leh hnuafual zawkte chanvo tura ruahman erawhchu a nep hle - 'Sa tah chhuak pek' an sawi ang mai a nih hi mawle!

Pu Speaker, entir nan - ka han sawi teh ang- S. Vanlaiphal Constituency chhungah chuan Mizoram lui lian ber Kolcdyne (Chhimtuipui) hi a luang tlang a, chu chu kawngpui pawimawh tak mai pakhat Hnahthial - S. Vanlaiphal kawngin a tan tlanga chu lai chu Darzo Ferry tih a ni. Kum tin in he lui lian tak hian mipui harsatna a thlen ziah a. Fur ah tui a lo tam hle e, lawnglengin inkar kai theih a ni lova. Kumin ah pawh hian August thla khan chu lui chu kai kai theih lohvin ni 15 emaw lai hun a awm a. Chu chuan mipui riltam mangang za tam tak a dang thup mai a. Mangang lutuka an awm avangin sawrkar pawl an khawih theih nghe nghe a ni. Riltama thi te pawh an awm deuh thaw a ni.

Tin, nikum July thla khan he lai hmunah hian Head-load la-in mipui nunau an inthier kai a, vanduai thlak takin mi 7 lain an nunna an hloh phah nghe nghe a ni.

"Pu Speaker, dik takin heng hotu hlun leh Minister te bial ah hi chuan Schedule for works pawh a lang tam lutuk ble a ni. Heti reng reng chu 'Vawkreka fate ang zung' kan nih mai dawn ni maw le?

Hei Aizawl Bazar phei ram buai laia kang chhia tunda leh nan Rs. 75 lakhs lai loan atan ruahman a han ni leh nghal a. "A nei apling pek belh a, a changkang sa deuh te chawh kan leh zual a, mi rethei leh hnuful te esas hi sorkar thil tih dan tur reng em ni ang le? Mi rethei te tan lah Rs. 20 lakhs chawh ruahman a ni si a. Pu Speaker, ka lung a awl thei lo a ni. Kei zawnv thingtlang khaw lam M.L.A. te chuan bial mipui ten ngakhlal takin min lo thil ve reng dawn a ni a, Hetiang Budget bu te hi kengin a hawn pawh kan hawnv ngam dawn em ni?

Thingtlang mipuite tan sorkar thil ruahman sawi tur lah a awm hauh lo a ni deuh mai si a.

Pu Speaker, sorkar school siam tur chungchang ah te hian mak chu ka ti deuh a ni. Thil tih awl samna hmun lam leh changkang sa deuh ten sorkar school te pawh hi an chang hmasa deuh zel dawn emaw tih mai tur a ni e. Thingtlang khaw kilkhawr leh khaw sawi khawm rethei tak tak te chuanv ngaihthah an ni mai zel dawn em ni ang? Lunglei District ah phei chuan school provincialise tur a ruahman a tlem hle leh nghal a.

Lunglei District leh Chhimituipui District lah hi a ram a in zau hleih hle a, mihring pawh kan in tam hleih nasa hle si a, inang khat ang deuh tlat mai a, sorkarin thil a rebawl hi chu mak ka ti lo thei lo a ni. Engvawng nasa Lunglei District hi Chhimituipui District nen inang tlang ang deuhin sorkar hian a enkawl tur a ni lo. Lunglei District chawh thil ang apling hi an chang ve phak zel tur pawh a ni hek lo.

Pu Speaker, zirna school hrang hrang heng - I.T.I. te, Junior Basic Training School leh Normal School te pawh hi Aizawl a dan khawm vek hi thil fel tak a ni thein ka hre lo. Normal School hi Aizawl ah hian site pawh a law awm lo a ni a, Lunglei ah te sawn awm ve mai se harsat na a awm chuawng hauh in ka ring lo. Ka han rawt duh nghal bawh a ni.

Tin, Road Communication thuah, heng kawngpui chhuah tawhna lam te ai hi chuan ram pilril leh kawng mumal la awm lohna lamah te hian kawng thar hreuh chhuah a tul hlein ka hria. Henglaia hmun changkang tawh sa lam a, approach road tih ang reng mai m-ai, chang tam tak seng a siam leh ringawt thin hian awmzia a nei tlem hle a ni.

SPEAKER: Hei hun a laklawh deuh va, chawhnu lamah chhuzawm leh mai ila, tunah chuan chawl rih ila, Dar 2 P.M. ah kan Budget discussion chu kan tan leh ang.

2 P.M.

SPEAKER Discussion kan tan leh nghal ang a, chawhma khan Pu Zalawma kha a han ding uk a, mahse hun a awm tak loh avangin a sawi thei ta lova. Tunah kan ko hmasa ang a.

PU ZALAWMA Pu Speaker, vawiinah kan Zoram Budget discussion kan nei hi lawmawm ka ti a. Mizoram tan kan in nghahna tur a kan hotu ten an lo buatsaih hi eng emaw chenah chuan kan tlai hret niin ka hria a.

Tunah hian Kum 1973-74 Budget tur, Head of Department ten an bei tan leh mek tawh a, kan hotu ten an execute hman lo mai ang tih ka hlau deuh va.

Agriculture lamah te economic lamah khawpui leh thingtlang kan harsatna a in ang veka kan budget hi a te tham deuh niin ka hria a. He Budget ah hian inthlahrunna awm thei hi paw ka ti a. Buai atanga kan tuihalna leh kan riltamna chu vawin thleng hian Development pawisa lam harsatna hi a ni fo va.

Thingtlang lam chuan kan manganna leh kan retheihna kan sawi uar hle a. Hei kan ram hi a bua-in lo atana kan siam tur hi a vang tan hle tawh a. Chuvang chuan Land Reclamation lam te hi kan uar a ngai a. He kan Budget hi chutiang Land Reclamation atana an siam hi a tlem tham deuh niin ka hria.

Agriculture Research Institute lamte hi kan hotute hian a pawimawh zia an hre kim lo deuh em ni aw ka ti a. Phai lam a chin chi te, tlangrama chin chi te hi kan ngaihtuah a dik Fovin ka ring a. Chutiang Land Reclaim tur chu khulam khawthlang lamah, Zawlpui ram chhehvel ah te khuan ala tam em em mai a, 1000 acres lai siam theih a la awm a ni. Kan Ministry lam te hi engemaw chenah kan mawh lo thei lovang a.

Heng kan Development Commissioner kan Chief Secretary te leh kan hotu dangte pawh hian kan ram harsatna chu a kima chang chuan an hre lo mai thei a. Hei kan ram in Legislature kan han nei thei ve ta a, a lawmawm hle mai a. Kan Minister te chu an hah hle dawnin ka hria a.

Tin, Village Council te pawh hi M.L.A. ang bawkin an hah ve em em mai a, Village Council te remuneration lamte hi tam tham deuhva tih nise a thain ka hre bawk a. Tin, Medical lamah hian damdawi tha hmuh loh avanga this leh tuar an tam hle bawk a. Facility thei zawk engtingge kan, neih theih ang tih te pawh hi kan ngaihtuah a tha a.

Tin, Doctor pakhat chu hmanah khan thingtlang lama post a ni a, mahse vawin thleng hian ala kal leh duh ta a chuang lova. Hetiangte pawh hi kan hotute hian bengvar deuh se ka duh a ni. He kan budget han thlir hian Buai atanga vawin ni thlenga kan harsat tawh zawng zawng thlirin kan hotute hian an siam tlem deuh niin ka hria a ni. Development hrang hrang han expandante pawh an thiam ang a, mahse han

Tin, January 21, 1972 atangin kan ram chu U.T. kan ni ta a. Education lam hi kan uar a pawimawh viauin ka hre bawk a. District Council hun lai khan kan ram population te hi kan lo chhut tawh thin a, chuta tang chuan Primary zirtirtu te pawh hi 400/500 l ngain kan hria a, mahse hei tunah kan sawrkar that chuan 200 lek a lo ruahman ta mai si a; hei hi a dikin ka hre thei lo bawk a.

District Council-in an lo lak tawh te kha an chhawm chho ve leh turah ka ngai a. Chutiangin District Council in kut an lo thlak tawhna te kha chu pah mai lovin an chhawm chhoh hi ka appeal duh a ni. District Council properties ka liberties chu kan sawrkar that pawh hian a khawm chho vek a, Congress in District Council sawrkar a lak chiah khan Mizo Union sawrkar in, House site 780 lai hmun an lo pek tawh sa pawh tihpuitlin chho ve mai kha a ni a.

Tin, L.P. Teacher appointment kan siam dawnin. Chief Commissioner (Administrator) in 100 posts a sanction na Development Commissioner Pu Gurunga hnena a thawn tur Administrator dawhkan ami ngei kan hmu a, mahse chu lehka chu a bo leh ta mai a, a tibotu chu zawh chhuah a tih chian ni bawk se ka duh a.

Hetiayang thilah hian sawrkar hmasa ina an lo tih tawhte chu kan in paihsak mai lova kan in zah thiam dial dial hi ka duh a. Hotu hnuhnung ten a hmasate thil lo tih tawh te chu kan in paihsak leh mai mai chu a felin ka ring lo. Thingtlang lamah sikul an mamawh em em mai a, chu chu hre rengin helaiyah hian kan ngaituah chu a dikin ka ring a ni.

Tin, Legislative Assembly Secretariat leh Hall sakna ruahman pawh hi a tlem lutukin ka hria. Allotment hi tuinge maw min lo curtail sak chu aw ka ti a. Finance chungchangah hian, Administration ah, sawrkar a kan in ngahna ber tur pawisa hi an ti tlem lutukin ka hria a. Education lamah U.T. kan nih chuan L.P. Teacher te hlawn pawh a tam ang tih UMPP a kan awm lai pawhin sawi a tam hle a. Tunah Rs. 80/- lek lek an hlawn a ni chauh mai a. Chuvangin Plan Scheme an siante hi a tlem tham em em mai a ni. Heta 75 nuai lo lang lah hi Dawrkai ho ta mai tur a ni a. Nuai 20 te chu han sem mahse, engmah tham a ni dawn si lova, pawisa hman chungchangah hian kan hotute hian an ngaituah famkim lo niin ka hria. U.T. sorkar kan ni a, Petrol te hi Assam State a kan awm lai man angin kan la lei mai mai zel a, hengte hi kan hotute hian an sual tawh emaw ka ti a. Rangva chungchang ah te pawh hian hman lawk ah te chuan Bundle ah Rs. 200/- emaw lek a ni a, tunah chuan Rs. 400/- dawn lai a kai chho ta mai a, hengte pawh hi ngun deuhin lo ngaituah sela ka duh a ni. A tawp nan chuan Tuirial Air Field hi hman theih a nih mai theih nan lo pawhzui se ka duh bawk a ni.

PU C. LALRUATA: Pu Speaker, hei kum 1972-73 Budget sawi hona ah hun ka nei ve hi ka lawm hle mai.

Thusawitu hmasa in hun a hmang hnem hle mai a, i duhsak deuh bik emaw ka ti a. Minute 15 hun nei turin darkar chanve lai a hmang a. He kan Budget a provision hi a te tham deuh kan ti niin a lang a, mahsela kei chuan hei ngawt pawh hi kan hmang zo hman lovang tih ka hlau va. Vawil khatah hmasawna a awm nghal vek thei lo va. Opposition memberte khan Budget kan peih fei thei lawk lo hi Central sorkar in min ngaihthah vangah an puh a, hre reng chungin mipui an zirtir ah ka ngai a, mahse an hre lo tak tak em ni aw ka ti hial a. Kan sawrkar kan inrem khawm chauh a ni a, sorkar ngelnghet tawh sa, thawktu engkim nei tawh te pawhin Budget buatsaih nan hian rei tak an duh thin a, vawlinah he Budget kan sawiho thei hi a lawmawm hlein ka hria a, kan hnathawktu te leh kan Ministry lam pawh an fakawm hle zawkin ka hria. Kan Budget kan sawi hona te kha a dikna lai chu a awm ngei chuan ka ring a. Ka bial tan pawh thil tul tak a awm a. Budget buatsaih dawn lai vel khan Development Commissioner hnenah ruahmanna ka pe lut vek a, a theih ang anga Budget a lo khung turin. Mahse chungte chu Schedule of Works ah hian a lang miah lova. Ka hre thiam viau a ni. Dik takin Silchar leh Aizawl tlangdung ah hian mihring pawh an tam a, hmun pawimawh tak India ram bung hrang hrang dangte nena kan in kal pawhna Gateway a ni ve a. Henglai ramte hi kan develop hmasa phawt tur a ni reng a, khawvel kalphungah hmasawna te hi khawpui leh hmun pawimawh atangin a in tan a, a zau zel a, thingtlang kil khawr te pawhin hma an sawn ve zel ani. Hei hi kan hre thiam tur niin ka ring a. Mahni Bial chauh mai kan ngaihthuah a, ram pum kan thlir loh chuan a dikin ka ring lo. Hma kan sawn zel ang a, kan bial theuh kan tih hmasawn hun chu a la thleng ang. Kan ngaihthuah zel ang a, hna kan thawk dawn tan chauh a ni.

Kan Finance Minister zawhawm tak thusawi phek 3 para (2)-na ah khan chhiah tih pun tumna ang deuh a lang a. Kha kha chu a tha dawn em ni aw ka ti deuh a. Chhiah tih pun hrim hrim hi a sual lova, amaherawhchu tuna kan dinhmun ah hi chuan chhiah tih pun hi a la warrant rih lovin ka hria a. Tuna kan pek pangngai, Leiman leh House Tax bak hi chu pe thei niin mipuite hi ka hre rih lo a ni. Tin, phek 4 para (5)-na ah sawrkarin District 3 a siam tawh a, Aizawl District chu Sub-Division 4 (pali) nen; Lunglei District chu Sub-division 2 nen tih a ni a. Heng sub-division siam te hi engatinge tun thleng a an la function loh? Eng eng te nge ni a, khawi nge an ramri tih leh khawi nge an Headquarters tih hi hriat a chakawm hlein ka hria a.

Tin, Housing Loan atan nuai 20 hi a tlem lutuk a, thingtlang mite tan a nih ve ngei leh nih loh pawh a lang lova. Heng housing loan te hmu thei tur hian dahkham tur eng-emaw tha deuh neih a ngai thin a, thingtlang mi mirethei te tan chuan chu chu a lo harsa thin a. Aizawl tan chuan nuai 75 lak tih a ni a. Provision hi thingtlang mite tan pawh awlsam tura siam ni sela. Village Council ten Inhmun leh huan an lo pek te hi loan an lak dawna a dahkham ah pawm sak theih ni ve se, thingtlang mite hi ngaihthuah ngai bik an ni a.

Tin, Para 8 para (1)-na a Committee hi siam a nih ka lo hre ve lova, bengvar loh vang pawh a ni thei a, eng chen nge hna an lo thawh tawh a, eng ang hmasawna nge a neih tawh tih te hriat a chakawm hlein ka hria. A.R. note hian kan hmun tha hi an luah tlat avangin an luah lai hi chhuahsan thei se kan ti theuh a, Committee hnathawh pawh hriat theih a chakawm hle. Water Supply hi a pawh mawh hle mai a. Tun hnaia Santon hri leng nasa tak avanga Phailam atanga Doctor lokal te pawhin kan water supply hi kan improve loh chuan hetiang natna khirh tak hi a awm fo-theih tur thu an sawi a. Veng lu lam ai chuan veng mawng lamin an tuar nasat tur thu te pawh an sawi a ni. He Water Supply titu Public Health Department hi an chak lo em em a. Ka bial chhung Chhiahtlang khuaah pawh Lamte lui lak tumin an in puahchak a, tuidawt pawh motor lian phur 3 lai an dah tawh a, mahse hun rei tak a liam tawh hnuah pawh an la ti puitling thei lova tuidawt te chu Village Council President in bulah an dah khawm ruih ~~xin~~ ringawt mai a. An scheme te chu tha leh mang lovin an hria a, thlak leha Mat lui tui siak chhuah hi a tha zawk awm mang e te an ti leh tawh a.

Tin, kumin June 22 vela Peon leh Chowkidar lak tur a interview an kohte pawh tun thleng hian an ti fel lova. A chhan engngemaw a awm ani awm mang e ka ti hial a ni. Chuvangin chak taka an thawhna turin tur an ngai a ni.

Tin, Medical ah hian Mizawl leh Lunglei a lang hnem hle mai a. Heng te hi a tha lo ni hauh lovin, hmun dang danga Damdawi in pawimawh tak tak Champhai, Serchhip leh Thingsulthliah te pawh hi tih len sak ni sela ka duh a. Medical Department pawh hi a chak lo em em a, ka bial chhunga Chhingchhip khua Dispensary ah chuan damdawi awm lai a awm mang lo. Damdawi tha dang chu sawi loh APC tak ngial pawh a awm lo a ni ber a. Ka han tlawh hnu hnun ber tum pawhin, ka chhiar chiah lo na a, APC chu mum 15 vel awa a ni. Civil Surgeon lam te pawh hian damdawi thawn te pawh an ngaihsak tawk lova, damdawi in varandah ah damdawi box te chu rei tak tak a let rem rum a ni Vawikhat pawh thawn turin ka ngen a, an thawn lohna chhan te ka zawt a. Lungpho ah pharmacist an awm lova, a thawn theih loh tiin min chhang a, Pharmacist chu dah vat turin ka ngen a, Chutiang chu thil awndan a ni a, Medical Department hi siam that a ngai em em a ni.

Tin, kan ram in khawkheng kan tuar nasa hle a, kan Assembly hian Mizoram ni khawkheng ramah kan puang thei mai lawm ni? Tunhnai ah Champhai velah ka han kal a. An buh te a chhe nasa em em. Phai zawl tam tak te chu tui a kang chat a. Tui awmna ah pawh buh a chhe nasa tho. Nei thei tura an in beisei ang chanve an nei zo kher lovanbg, Thingtlang pheh chu an chhe nasa leh zual. India ramah pawh kuminah an buaipui a, Minister te meuh pawh an vir buai nasa a. buh seng hma atang pawhin khawkheng ramah an puang a, lo neitu te hnenah tanpuina tam tak tak an po a ni. Chutiang chuan kan ram pawh hi ti ve ila, nakum lam kan hmabak hi a thim hle a ni.

Tin, District pathum siam thar Aizawl, Lunglei leh Chhimituipui ah te hian District Veterinary Officer hran theuh dah ni bawk sela ka duh bawk a ni.

PU CH. SAPRAWNGA: Pu Speaker, Kan Opposition Leader-in a sawi kan nghak deuh a, a duh tawk han sawi se ka han thiat zar zar ang chu ka ti ani a, mahse a ding duh si lova, mi thiat a tum ni zawkin ka ring a, lo ngaithla sela.

Kan Budget hi hun rei tak kan nghah hnuin kan nei thei ta hram a, hmun thenkhat ah chuan "Kan pawl kan sorkar loh avangin lo hrek deuh tura sorkar hotute kan tih vang a ni e" tiin khawi lai laiah emaw te chuan lo tawng an awm a ni awm e. Mahse an dang thei ta lo a ni ang chu, Budget Session kan nei ta si a.

Kan budget a a amount hi a tlem na a, a thawh nan hun pawh kan nghah tawh loh avangin anih ang ang hi hman that dan ngaihtuah nise ka duh a. A hmasain kan Assembly Hall hi kan cheibawl ta lutukin ka hria a. Hetianga thil hlui chei chei mai hi kan tih tur a ni lovang. A thar kan ngaihtuah ngai tur a ni ang. Visitor te pawh hi kan nei thei tlem lutuk a, helaia thurel ngaithla chak an tam teh lul nen member 30 rualin Visitors 30 chauh mai kan nei thei te hi a tawk lo em em a ni. Chuvangin tam deuh zawk neih theih dan ngaihtuah a tul a ni.

Kan budget kan han thlir hian tun hmaa thil awm tawhte a tangin kan hisap tur a ni a. Tunah hian hun kan nei tlem hle tawh a, hemi chhunga heng pawisa hmangral thei turin Administrative Machinery tha a ngai a. Hemi hi a pawimawh em em a ni. Hei hi remfel hmasak apih thuai loh chuan pawisa chu eng zat pawh awm mahse sawtna a awm chuang lo vang. Hemi thuah hian a thawktu tur lak thuah pawh pawisa hi kan hman dik a ngaih avangin fimkhur a tul em em a. Pawisa tam tak a nih tur ang taka hman tak loh hi tunhma te pawhin a tam mai thin a. Tunah chung chu a bo theih nan mitin ten mit kan len ngun tur a ni. Hmun thenkhat ah chuan Department thenkhat te chu an corrupt viauin sawi a ni a, mahse Department zawng zawng te chu an corrupt vek lem lo a. Pawisa hi a kalna tur takah a kal a tul a. Chuvangin Officer tha leh tha lo, fel leh fel lo, rinawm leh rinawm lo, taima leh taima lo te a awm theih a, Officer tha te chu promotion thuah pawh hriat a ngai a. Promotion thuah hian Seniority ngawr ngawr hi thlir tur a ni lova, efficient leh efficient lo te en in a fel leh tha chu Junior deuh mahse kan kai tir tur a ni. Heng hi kan thlir ngun loh chuan pawisa tam mahse hna kan thawktak tak thei chuang lovang. Hetiang corruption thil hi tih bo thak theih chu a ni lo ang a, mahse a theih chin chinah chuan tih bo tum tur a ni. Heng thilah hian Administration fel tawk a mamawh a. A lian lam hi an fel loh chuan a te lam hian an ontawna te an nih thin si avangin Administrative Machinery a that a ngai a ni. Chu chu kan hotuten lo enzui se a tha ang.

Tin, kan sawrkar hian thil tih hmasak tur leh tur leh pawh lo an hmasak a tul bik a ni. Kan lo

Hmanah chuan Assam sorkarin ral khatah hna an rawn thawh thin avangin Planning Board te pawh a hming chuan awm ve bawk mahse hna an thawh a lang lo em em a. Tunah hian keini sorkar ngei pawhin Planning Board te chu a han din ve bawk a. Hetah hian mi langsar deuh te leh Minister te hi member ah kan dah vek kher tur a ni lova, pawn lam mi, mi tha deuh leh mi hawizau deuh te hi kan telh tur a ni ang. Hei hi Top priority pek chi a ni. Kan ram hmasawna atan hian Agriculture lam hi ngaihtuah hmasak a tul a, mipui te inngahna ber pawh hi ho Department hi a ni tih ka hma a member te pawh khan an sawi tawh a. Kan ram kan pachhiat tawh em avangin T.R. leh G.R. velah hian kan innghat lutuk tawh a. Hei hi tih tawp theih dan ngaihtuah a tul a ni. Chuvangin kan ramah buh leh thlai a lo hlawk zawk theih nan Pu Zalawman a sawi tawh angin Research te pawh siam a tul a ni. Tuna kan Agriculture Department kal dan ang ngawt hi chuan engtikah mah hma kan sawn dawn lo a ni. Thlai chin uar in hrilh hi a tul tawh em em lo. Kan Dry Terrace ah te hian eng thlai nge tha thei ang, eng anga chin tur nge ni ang tih hi inhrilh a tul zawk a ni.

Buh leh thlai hi mahni duhna hmun hmuna ching mai lovin a ngeih lai hmun tur te hi zawn a ngai a ni. Mizote hi a nawra nawr chi kan ni lova, ngun teka hrilha zirtir kan ngai zawk a ni. A hlawk thei ber tura tih dan hi zirtir kan tul a ni. Tin, thlai chi Contractor ten an supply in a to thei lo, a chhia supply an ching thin niin a lang a, Balhla an supply lahin Changel tam tak an telh a, Lakhuih-thei tih lahin a zik bul te an telh bawk a. Kan sawrkar thar ah hi chuan Agriculture Department hi kan en ngun dawn a ni tih an lo in hriat a tha ang. Eitur ah hian tun tut tut ah kan intodelh nghal mai dawn lova, pawn lam atangin kan la la lut lo thei hrilh lova, hemi chung hian an ni Department hian tan an lo la tur a ni.

Tin, Cash Crop thuah hian kan chin ve theih Sawhthing hi hman kum kha chuan a man te pawh a tha viau a. Tum khat pawh Sawhthing hralh dan tur en thli thlai turin khawril lamah mi pakhat tih a ni a, mahse a report ah chuan Sawhthing hralhna tlak ni awmin a sawi lova, chu chuan mi a ti zuai a, mahse hman lawkah tu emaw a lokal a, Sawhthing hi man man tak leh chin nah-awm tak a ni tiin a rawn sawi leh si a, chuvangin Sawhthing chin tlak lo ni awma mi rilru ti zuai zawnga report pe tu kha tunge ni a, chhui leta engemaw ti a tih a tul a ni.

Tin, P.W.D. hi kan ramah an hming a thang mawi vak lova, that famkim chu a har hle reng a, mahse tlema tih dan han thlak deuh a hming that mai theih anih avangin in siam that deuh tum se a dik ang. An Department hotute hian hna thawk deuh tak tak an tum tur a ni. P.W.D. lam thuah tukina kan Chief Minister in zawhna a chhanha te kha ka duh tawk lovin ka lung a adi mang lo. Khilai Tuichang luiah thirhruil pawh awm lova, Chowkidar 3 ngawt hnathawh tur nei si lo dah te kha a fel lo hle a. Thil an ti dik lo hle a ni.

Tin, Soil Conservation lam hi a tha dawn niin
- lang a An hnathawh tawh ah chuan Rubber Plantation te,

Tin, Law and Order thua hian ram buai kan nih avang in Security Forces te hi awm lo thei an ni lova. Mahse an chet dan fo hi a fel lo thin hle mai a. Tun maiah pawh chhim lamah nula 3, 19th Punjab Regiment in an sual tih Chianchin bu ah a lo lang a, hetiang Security force te an che fo hian kan hnam min zah lohzia a ti lang chiang em em a, a mualpho thlak hle a ni. Kan hotuten lo enzui teh se. Tin, hmanni ah tang pakhat a tlan chhuak a, a man leh turin kan Lt. Governor chuan sipai Battalion khat a tir chhuaka sawi a ni. Tun tumah chhim lamah mi pakhat Security force in an tihlum thua hian engtingge enquiry a kal tih te pawh hriat a tha ang. hmeichhe sual (rape) te hi a tam lutuk a, mi man mai mai te hi a tam lutuk a. A tulah chuan man awm chu man pawh a tha a, mahse an dik nge dik lo tih pawh fiah hmasa lova pawngpaw vuak mai mai te hi chu a awm tur a ni lo. Assembly House te hial kan lo neih ve tak avangin kan sang ve hle tawh a, chuvangin kan hotuten hetiang thil awm fo hi in chhui zui a tul a ni. Mipui hian he House chungah hian beisei an nei sang hle mai a, chuvangin hetiang thilah te hian kan hotuten hna an thawh zui zel a tul em em a ni.

FU K.L.ROCHAMA: Pu Speaker, Mizoram mipui zawng zawngin kan lo nghahhlel ber Budget Session chu tluang takin kan nei tan thei ta a, a lawmawm hle a ni. Kan Chief Whip in a sawi tawh ang khan hnathawhna hun kan neih tlem tawh em avangin kan Budget provision a pawisa ruahman hi tlem deuh angin lang mahsela, kan hman zawh hman loh hi a hlauhawm zawkin ka hria a. Budget hi lo ruahman teuh mah ila kan hman ral hman leh loh chuan pawisa chu surrender leh mai ang tih a hlauhawm a. Budget puahchahna atan hun kan neih tlemzia leh hnathawktute kan neih tlem ziate kan ngaihtuahin hetiang an lo peih hman hi a thawktute an fak-awm hle a ni.

Kan Finance Minister zahawm tak Budget Speech phek 1-na para 3-ah khan India sorkar chuan kan harsatna bikte min hriatpui avangin a bik taka tan lak an tum dante kan hria a, a thlamuan thlak hlein ka hria. Nagaland harsatna bikte pawh a hriatpui avangin a bik takin a enkawl a, development kawng hrang hrang bakah Member-te tana facilities a pek dan zawng zawngte chu ka sawi seng lovang a. Tuna kan Budget-in a huam chinah kan ngenngawlna tur lai chu kan hotuten lo hre reng turin ka ngen hmasa duh a.

Phek 2, para 2-na ah hian Mizoram sorkar tan consolidated fund siam a ni tih kan hmu a. Tin, pawisa thua harsatna kan nei lovang tih kan hre baw a, tuna kan Budget a pawisa ruahman bakah 'Plan Scheme' atan pawisa hman belh zel tur a la awm baw avangin a thlamuan thlak hle a ni. Kan hun neih a tlem em avangin tun financial year hi chu sorkar khawl remkhawmna hun atan hman a tul ang a. Appointment te pawh tang taka tih fel a tul ang.

Kan ram chu hman lawkah Mautam tamin min nang a, ram buai in min han nang zui leh a. Tunah hian kan rilru a hman ta em em mai a. Mi tam ber chuan kutdawh rilru kan pu tawh niin a lang a, a thlawna dawn tumna rilru kan put avangin hriatpui tak tih tak tawh...

Phek 4-na para 1-ah hian Mizoram chu District pathumah then anih thu kan hmu a. Tuna heng District pathumte ramri kham dan kan en chuan mipui an in tam hleih hle mai a. Tin, hmun thenkhat - Thenzawl, Bungtlang Grouping Centre- angahte chuan Lunglei District huam chhunga khuate chu Aizawl District ah an lut a. Lo ram theh thua hengte hian harsatna min la thlen ang. Chuvangin an remchan dan ang angin mipui inzat deuhva District ramri hi siam that ni thei se thain ka hria.

Tin, phek 4-na para-2 ah hian Village Council chu Local Administration Department in a enkawl ang tih kan hmu a, mahse khawpui (Town) enkawl dan tur kawi chianna a awm lova. Aizawl leh Lunglei khawpui ah te hi chuan Town Committee tal awm ve ngei se thain ka hria.

Tin, Phek 4-na para-4 ah hian Land Reclamation thu a lo lang a. Leilet a siam theih lai laite chu a rang thei ang bera kan buatsaih a tul tak meuh va. Mahse tuna tanpuina kan pek danah erawh hi chuan inpek thua (duplication) a tam deuh a. Development Block Agriculture Department leh Soil Conservation Department te hian tanpuina an pe theuh mai a. Hei hian intlansiakna dik lovah lo neitute a tlan tir a. Chuvangin Department pakhatin he hna hi kang kawh se thain ka hria.

Tin, phek 4, para 5-naah Development lama hnathawh chak zawk dan tur a lo lang a. Hei hi a pawimawh a ni. Ram buai avangin Development Block hnathawh chu a chawl ta a. Tunah hian a buk kan tan leh dawn a ni a. Chuvangin Block thar leh ni se. Tin, nakum lamah chuan ~~hmu~~ Block that lo hawn belh tur pawh hi hawn hman ngei tum nise thain ka hria a ni.

Tin, phek 5, para 1-na ah dandawiin tih that thu kan hmu a. A bik takin Lunglei Civil Hospital saw siam that a ngai nasa hle. Hman deuhva Lt. Governor lokal tum khan repair turin a ti a. Mahse tun thlengin engmah hnuhma kan la hmu lo va. Tunah sawn Doctor pahnih chauh kan nci a, pakhat a dam lova, a dam zawk lah a hmantlak si loh. Tin, Ambulance Van pawh kan neih loh avangin Doctor damlo pawhin private vehicle zawn chauh a ngai a ni.

Tin, phek 6-na para 3-ah Aizawl Industrial Training Institute chu Silchar ah a awm tih thu kan hmu a. 'Mat vuaka Tuichang dap' tih anga thil inhmei lo ni-ah ka ngai. A rang thei ang berin Aizawl hmun ngeie sawn chhoh ni rawh se. Tin, Zotlang (Lunglei) ah Industries Department in Production Centre atan Institute turin buai hma khan an sa peih vek a. Sipalin an luah ta mai mai te saw a nihna tur dik taka hman thuai ni rawh se.

Tin, phek 7-na para 1-ah Directorate of Information etc. siam anih thu kan hmu a. Mizoram dinhmun sang zawka a lo din hauah he Department hian mawhpurhna a nei sang hle a. Mizoram palai leh Salesman tiin vuah ila a sual lovang. Lunglei ah leh Saihaah sawn District Information & Public Relations Officer dah thuai nise. Lunglei ah Publicity

Tin, phek 7-na para 4-ah Officer te leh Member te chenna in sak thu kan hmu a, a lawmawm hle. Thingtlang lan atanga member rethei te te lokal kan ni a. Accomodation hi a tul tak meuh a ni. Tuna kan Member Hostel pawh hi mawi hnai zawka siam that a tul a ni.

Tin, phek 8 para 3-na ah Water Supply thu kan hmu a. Aizawl khawpui chhungah ngei pawh tui tam tawk sawrkar in a la pe thei lova. Lunglei ah phei chuan kan harsa lehzuala Public Health Engineering Department lah hi chanchibu in a chhuah angin "PHE" tih takah an phi pawh kan hmu phak lo a ni ber e. Kumin June thla vel khan Principal Engineer in "Tun atanga thla riat chhungin in mamawh zat ka pe ang che u" tiin min hrilh a. Mahse tun thlengin far khat pawh in la pe lova. Hei hi ngaih pawimawh a hun ta.

Tin, Phek 9, para 4-ah Electricity thu kan hmu a, Aizawl khawpui chuan nitin darkar 24 kan chhi thei tawha, mahse khawpui dangah chuan a hming chauhvinn kan chhi ve a, Lunglei leh Chhimituipui tan chuan tuna Umium Hydrel Project atanga kan lak tur hi kan chhawr phak lawk a rinawm lohva, kan Lt. Governor-in a Tour Diary a a ziah angin Bangla Desh a Kaptai Dam atangin Demagiri ah la ta ila, kan tangkaipui zawk ang. Tin, helai tih hma hian Lunglei ah Dam Generator lian deuh 100 KW. tal chhit ve ni thei se a tha ang.

Tin, phek 10, para 2-naah Rehabilitation thu kan hmu a. India sawrkarin ram buai avanga inbenbelna tur min pe hi a lawmawm hle. Mahse ram buai avanga in leh lo chan ve tho, thingtlang lama awm remchang ve lo, khawpui lo tlan- chhia te hi engmah ruahmanna a la awm lova. Hei hi ngaituaksak ni ve ngei rawh se.

Tin, phek 12 para 1-naah hian Education lama sorkar thil ruahmante a lo lang a. A tlangpuiin a lawmawm hle in ka hria. A bik takin Lunglei College ah pawh Science Course hawn alo ni ta hi a lawmawm ka ti lehzual a. Mahse Science Building atan pawisa ruahman a awm lo niin a langa. Hei hi sawrkarin han ngaihtuah rang turin ka ngen a ~~ek~~ a ni.

PU CH. SAPRAWNGA: Pu Speaker, naktuk atan an khek a ni ang a! i bansan rih mai ang u.

SPEAKER: Sawi tur a awm tawh loh chuan i bang ang u. Naktuk dar 10:00 A.M. ah kan tan leh ang.

Meeting adjourned at 3:45 P.M.

Sd/- B.T.Sanga,
Under Secretary,
Legislative Assembly,
Mizoram.